

FORUM

Quels carezai cuolms

En la proxima sera «da cuminonza a Ruschein» vai buca per pézs e muntognas, mobein per misses, acelas, prümarians ni sco quei ch'ei ha num en la Foppa – per cuolms. Tgi che posseda ni arta in cuolm sa tschintschar da cletg – perquei che cumprar in ei buca sempel. Ils cuolms ein daventai «caussa rara» e consequentamein «caussa cara» ils davos onns.

Dapi igl onn 2016 ha ei per ordinari dau mintgamai sis occurrenzas «da cuminonza a Ruschein» – treis la primavera e treis igl atun. Uonn dat ei ina dapli, ina «extra da stad» cun il tema «cuolms». Tschun persunas ch'han buca dimora el vitg da Ruschein raquantan co ellas ein vegnidas tier lur cuolm. Ellas tradeschan tgei muntada che lur cuolm ha per ellas e nua che ellas vesan las veras bellezias da lur cuolm.

Birgit Bächler da Würenlingen ei leda che ses geniturs han giu la schanza da cumprar in cuolm sur Ruschein avon 50 onns. *Simon Caduff* da Geroldswil ei vegnius tier siu cuolm grazia a siu bab permiert ch'era da Ruschein.

Birgit e Simon raquantan per tudestg tgei ch'els apprezzieschan cunzun cura ch'els ein si cuolm. *Reto Cavegn* che stat a Trin ei, ensemen cun ses treis frars, possessur d'in cuolm da famiglia. *Veronica Cathomen-Casanova* manegia ch'ella seigi «memia darar» sin siu colm sur Ruschein. Ella habitescha a Breil ed ha, da siu cuolm da famiglia, bellezia regurdientschas d'affon. E *Claudia Cadruvi* che stat ad Uznach ha cumprau anavos avon dus onns il cuolm che siu bab (ch'era carschius si a Surrein) veva schau vi igl onn 1980 per 100 onns ad in bab da famiglia da Ruschein.

Historias e regurdientschas dat ei dapertut – aschia era en connex cun tegias da cuolm. L'entrada a «da cuminonza» ei gratuita e beinvegnidas ein sco adina era persunas d'ordeifer. «Ils cuolms da Ruschein/Die lieben Maiensässe» – sonda, ils 3 d'uost 2024, 20.15, Casa da scola Crestas, stanza 11, Ruschein. Dapli sin www.dacuminonza.ch.

Maria Cadruvi



Cuolms da Ruschein.